

Date – 30/10/2024

Time - 18:30 Hrs

1. Chief Minister Pu Lalduhoma'n natna thar hrang hrang tam chho zelah damdawi lama mithiam bikte mamawhna a sang zel, a ti.
2. Mizo Zirlai Pawl (MZP) hmalaknain Mizoram chhunga document lem siamtu ni ngeia hriat mi pakhat man a ni.
3. Prime Minister Narendra Modia chuan zanin hian Ekta Nagar-ah hmasawwna project cheng vaibelchhe 280 hu a hawng ang
4. Jharkhand Assembly inthlan thawh hnihna leh Maharastra assembly inthlan nomination te wawiinah endik a ni.

<><><>

CM AT ZMC

Chief Minister Pu Lalduhoma'n natna thar hrang hrang tam chho zelah damdawi lama mithiam bikte mamawhna a sang zel, a ti.

Vawiina Zoram Medical College (ZMC), Falkawna Curie Ladies Hostel leh post-graduate course thar, Master of Public Health course a hawwnaah he thu hi a sawi a.

Chief Minister chuan Zoram Medical College-a hostel thar leh course thar hawn a ni chu Mizoram tan thil chhinchhiahtlak tak a ni, a ti a. Chief Minister chuan post graduate course hawn tak chuan nasa takin natna hrang hrang tihdam hnaah a puih a beisei thu a sawi a. ZMC enkawltute chu an hnathawh that avanga lawmthu hrilhin ruhrela hmasawwna chauh ni lo, inpekna nena hma la chhunzawm zel turin a chah a. ZMC chu sorkarin kil tinah a ngaihsak zel dawn tih Chief Minister chuan sawiin ZMC hnathawktuteah sorkar ta leh society ta an awm hran a, hei hi sorkar ta ni vek turin hma an la a, hemi atan hian cabinet memorandum buatsaih a ni tawh a; Cabinet meeting hmasa berah tihfel a ni ang, a ti a. National Medical Commission atanga ZMC-in fakna a dawng chuan ZMC zirna that zia a tilang chiang hle tih a sawi bawk.

Chief Minister chuan vawiina hawn tak hmeichhe hostel thar avang hian a hmaa hmeichhe tana hostel-a seat 202 awm chu seat 282-ah a kai chho tawh dawn a ni, a ti a. Nakina ram tana mi pawimawh tur zirlai hmeichhiate ngaihsaka enkawl a pawimawh hle tih sawiin hostel thar pawh chu lehkha zirna atana an mamawh leh an zir chhunga an chenna tur tha ngaihtuhsakna hna pawimawh tak a ni, a ti a. ZMC-in mamawh an neiha an koh hun apianga chhang turin sorkar chu a inkau reng a ni, a ti bawk

<><><>

MIZORAM STATE POLICY COORDINATION COMMITTEE

Mizoram State Policy Coordination Committee (MSPCC) chuan Bana Kaih Scheme kal mekah Taxi (2-wheeler, 4-wheeler leh autorickshaw) atana dilna chu Handholding Scheme-in a huam tel loh thu an sawi. Vawin khan MSPCC hi thu khawmin department thenkhat hnuaia dilna lutte an ngaihtuah a. Taxi bik hi Bana Kaih-in huam lo mah se Commercial Passenger Vehicle dangah chuan a diltu ngei hminga State Transport Authority (STA) permit emaw licence emaw nei tawh te chu scheme hian a huam thei dawn thung, an ti a. CM Special Package dilna Chief Minister Office-a dilna thehluh tura ruahman chu mipui remchan zawkna atan mahni district Deputy Commissioner-te hnenah pawh dilna thehluh thei tawh tura rel a ni. Bana Kaih Scheme inkaihhruaina bu Mizo tawnga lehlin chu thlirhoin pawm a ni a. Scheme vawrh lar dan tur chungchang sawiho a ni bawk.

<><><>

MZP

Mizo Zirlai Pawl (MZP) hmalaknain Mizoram chhunga document lem siamtu ni ngeia hriat mi pakhat man a ni.

MZP chuan vawiina an thuchhuahah Mizoram chhung ngeiah certificate leh document lem hrang hrang siam a tam hlea an hriat thu an sawi a. Hei hi Mizoram tan leh zirlaite tana thil pawl tak a nih theih dawn avangin tihtawp a nih theih nan hma an la nghal tih an sawi a, document lem siamtu ni ngeia hriat mi pakhat man nghal a ni, an ti.

MZP chuan tun hnaiah certificate leh document lem siam an awm ngei nia a hriat avangin uluk takin a chhui zui nghal tih an sawi a. Document hrang hrang - Educational certificate (pawl sarh atanga a chunglam zawng), Birth certificate, Driving License,

Professional Certificate (B.Ed., D.El.Ed. leh a dangte) chu timna nei hauh lovin a lem siam chhuak an awm ngeia an hriat thu an sawi a. An finfiah hnuah dan anga hmalak a nih theih nan Home Minister Pu K. Sapdanga an sawipui nghalin hma la turin an ngen tih an sawi a. Home Minister chuan chak taka bawhzui nghalin certificate lem siamtu ni ngeia hriat mi pakhat chu tunah hian Police ten an man tawh tih an sawi a ni.

MZP chuan Home Minister-in chak taka hma a laknaah lawmthu sawiin zirlaiten hun leh tha tam tak senga certificate an sual chhuah laia awlsam taka certificate leh document lem hrang hrang Mizoramah ngei ngampa taka siamchhuah a ni chu pawl an tih thu leh an dodal tlat thu an sawi a. Hetiang thil a awm tawh loh nan chak taka hmala turin Mizoram sawrkar an ngen nawn tih sawiin MZP pawhin uluk takin a enzui zel dawn a ni, an ti.

<><><>

RASTRIYA EKTA DIWAS PLEDGE

Vawiin khan MINECO-a Secretariat tualzawl-ah Chief Secretary Dr. Renu Sharma-i hovin Rashtriya Ekta Diwas (Inpumkhatna Ni) thutiam sawirual a ni. Rastriya Ekta Diwas hi kum tin October ni 31, Sardar Vallabhbhai Patel-a piancham puala hman thin a ni a; kumin October ni 31 hi sorkar chawlh a nih avangin vawiin hian hman a ni. Inpumkhatna thutiam hi Secretariat-a Officer leh thawktu zawng zawngte'n sawi rualin Mizoram hmun hrang hranga sorkar Office hrang hrangah he thutiam hi sawi rual a ni ve bawk.

<><><>

KHAWZAWL – MERCHANTS CHECKING

Khawzawl District Consumer Protection Council chuan Khawzawl khawpui chhunga thil zuartu hrang hrang, Dawrkai, Motor part zuar, Rod leh Cement zuarte bakah Retailer-te endik runpui neiin vawiin khan hmun hrang hrang fangkualin an endik a. Food Civil Supply & Consumer Affairs Department DCSO Office-a thawkte, District Magistrate, District Consumer Union hruaitute leh Police ten endik hna hi an thawk a ni.

<><><>

FREE CLINIC

Regional Institute of Paramedical and Nursing Sciences, (RIPANS) Zemabawk leh kum 1980-82-a Pachhunga University College-a Science Subject zir, 'Lenrual hlui' tangdun chuan vawiin khan Pachhunga University College-ah Zirlai leh hnathawktu, a mamawh apiangte tan a thlawna inentirna an huaihawt a, mi 509 an inentir. RIPANS College of Nursing Princical, Prof. Lalfamkimi chuan hmun kilkhawra cheng leh harsa zawkte tan Lenrual hlui leh RIPANS in hmun hrang hrang - Zokhawthar, Farkawn, Saipum, Tuirial leh Suangpuilawnah te a thlawna inentirna an huaihawt tawh thu leh, Pachhunga University College chu an lo zirchhuahna hmun a nih avangin tuna Zirlai kal mekte tan a thlawna inentirna buatsaih an nih thu a sawi a. RIPANS zirlai leh PUC zirlai ten an thiam thilte an entir bawk. He hunah hian Lenrual hlui team-a Doctor te leh an fa Doctor te'n damlote an en a, an damdawi leite damlote hnenah a thlawna sem a ni bawk.

<><><>

AIR News on Social Media

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te ngaihthlak leh chhiar theih a dah a ni.

<><><>

PM MODI IN GUJARAT

Prime Minister Narendra Modia chuan zanin hian Ekta Nagar-ah hmasawna project cheng vaibelchhe 280 hu a hawng ang. Pu Modia hian ni hnih cham turin vawiin tlai khan Gujarat a thleng a. Common Foundation Course in Aarambh wawi 99-naah Officer Training tharte hmaah thu a sawi dawn bawk a. Project a hawn tur zingah hian khualzin hipna lamte leh inkalpawhna lamte a tel a ni. Kan corr report i lo ngai thla ang.

<><><>

ELECTIONS

Jharkhand Assembly inthlan thawh hnihna leh Maharashtra assembly inthlan nomination te vawiinah endik a ni a. Jharkhand-ah hian candidate 634 an awm a. Inthlan thawh hnihna hi November ni 20 ah neih a ni ang. Kan Corr report i lo ngaihthal ang.

Maharashtra ah chuan inthlan thawhkhata neih tur niin vawiin vek khan nomination endik a ni a. Bial 288 a nomination zawng zawng hi 7995 a ni a. November ni 4 thleng inhnudawh theih a ni a, November ni 20 ah vote thlak tur niin November ni 23 ah vote chhiar a ni ang.

<><><>